

# 'Haji Murat' karya terindah, terbaik dunia - PM

**KUALA LUMPUR:** Datuk Seri Anwar Ibrahim menyifatkan pentas teater 'Haji Murat' yang diadaptasikan daripada novel pendek tulisan Tolstoy sebagai karya penceritaan yang terindah dan terbaik di dunia.

Perdana Menteri berkata, ini merupakan satu daripada karya yang wajar dipertontonkan kepada semua lapisan masyarakat khususnya generasi muda supaya mereka dapat memahami

perjuangan sejarah Islam dengan lebih mendalam.

"Saya fikir perlu untuk mengajak orang ramai terutamanya anak-anak muda melihat kekuatan novel pendek yang memiliki penceritaan terindah dan terbaik di dunia.

"Saya belum mengerti mengapa di dunia barat ia tidak begitu popular sedangkan ini karya sastera yang luar biasa. Jadi kita kena hebahkan dan

tidak perlu tunggu mereka. Mudah-mudahan ada manfaatnya," katanya ketika berucap sebelum menonton pentas teater Haji Murat di Balai Budaya Tun Syed Nasir, Wisma Dewan Bahasa dan Pustaka (DBP), di sini, semalam.

Haji Murat merupakan karya terakhir yang ditulis oleh Sasterawan Dunia, Leo Tolstoy bermula 1896 hingga 1904 dan diterbitkan setelah kematian-

nya pada 1912.

Karya tersebut mengangkat tema jihad dan perjuangan bangsa dan ditulis berdasarkan kisah benar yang berlaku pada 1851 di mana ia melibatkan pejuang Chechen bernama Haji Murat yang membentuk perikatan dengan Rusia yang pernah ditentangnya kerana ingin membalas dendam.

Pementasan Teater Perdana Haji Murat arahan A Wahab

Hamzah yang diterbitkan bersama Badan Budaya DBP, DBP dan Kementerian Pelancongan, Seni dan Budaya (MOTAC) itu melibatkan seramai 100 pelakon termasuk nama-nama gah dalam seni teater seperti Che Kem, Dr. Rusdeen Suboh serta Ard Omar.

Tayangan akan berlangsung selama empat hari bermula 26 hingga 29 Jun ini bertempat di Balai Budaya Tun Syed Nasir, Wisma DBP.